

Zaključci sa IV obuke „Disciplinski postupak i praksa“

Hotel Mostar, Mostar
23. i 24. maj 2024. godine

1. Potrebno je da pored redovnih obuka ovog tipa, disciplinske komisije Visokog sudskog i tužilačkog vijeća Bosne i Hercegovine povremeno održavaju zajedničke sastanke radi ujednačavanja disciplinske prakse i utvrđivanja jedinstvenih standarda u vođenju postupaka i donošenju odluka u disciplinskim predmetima protiv sudija i tužilaca;
2. U nedostatku domaće prakse za pojedine nove prekršaje, uključujući prekršaj *kršenje principa Etičkog kodeksa sudija/tužilaca koji su doveli do narušavanja ugleda i integriteta pravosuđa, a koji nisu propisani kao zaseban prekršaj*, potrebno je da disciplinske komisije uzmu u obzir standarde utvrđene u praksi Evropskog suda za ljudska prava i Ustavnog suda Bosne i Hercegovine, naročito standarde iz odluke *Guz protiv Poljske*, čiji će se prevod hitno dostaviti svim članovima disciplinskih komisija VSTV-a BiH u integralnom obliku;
3. Disciplinske komisije će kroz obrazloženje svojih odluka učiniti maksimalne napore da “prosječnom čitatelju” približe i pojasne sve pravne pojmove, naročito u slučajevima novih disciplinskih prekršaja sa kojima se nisu susretali u dosadašnjoj praksi, kako bi na taj način dodatno doprinijeli predvidljivosti istih;
4. Radi unapređenja efikasnosti i kvaliteta disciplinskih postupaka i odluka, preporučuje se disciplinskim komisijama da adekvatnije koriste pripremno ročište za razdvajanje spornih od nespornih činjenica, da se glavna rasprava koristi za potpuno raspravljanje spornih činjenica i izvođenja dokaza kojima se te činjenice dokazuju, te da se u obrazloženjima disciplinskih odluka jasno naznači koja je činjenica utvrđena i sa kojim dokazom;
5. Potrebno je još jednom preispitati kvalitet zakonske norme koja se tiče automatskog razrješenja, to jest prestanka mandata sudije, odnosno tužioca u slučaju pravomoćne presude kojom je osuđen za krivično djelo za koje zakon predviđa kaznu zatvora;
6. Preporučuje se da se UDT uključi u obuke ovog tipa kako bi svi organi uključeni u disciplinski postupak protiv sudija i tužilaca u Bosni i Hercegovini kontinuirano unapređivali znanja i vještine sa ciljem sveobuhvatnijeg ispitivanja navoda i okolnosti svakog pojedinačnog slučaja, a radi dosljednije prakse pokretanja disciplinskog postupka i predlaganja disciplinskih mjera usklađene sa svrhom vođenja ovog postupka;
7. S ciljem generalne prevencije potrebno je dodatno raditi na preveniranju nedozvoljenih ponašanja na način da se pravosudnoj zajednici na brz i efikasan način omogućiti uvid u odgovore Stalne komisije za etiku i integritet VSTV-a BiH na upite nosilaca pravosudnih funkcija o spojivosti, kao i sažeci odluka disciplinskih komisija, te da se kroz redovan sistem edukacije nastavi sa provođenjem obuka i radionica ovog tipa za sve nosioce pravosudnih funkcija.